

REGIONAL NEWS

NH REPAIR

Mizoram Assembly Deputy Speaker Pu Lalfamkima kaihhruaiin Kolasib District paltlangtu National Highway siamthat hna thawh dan tur chungchangah NHIDCL hotute leh an hnuaia contractor-te nen sawihona buatsaih a ni.

He hunah hian Pu Lalfamkima chuan fur ruahtui a zawh tawh avangin hna thawh tan theih a ni tawh a ti a, hnathawktu tur NHIDCL leh contractor-te an inbuatsaih dan a zawt bawk. NHIDCL hotute chuan an hmalakna hrang hrang tarlangin, Buichali atanga Khamrang kawng chhe zual lai siam an zawh hnaih tawh thu leh Kawnpui leh Khamrang khawih chhonzawm mek a nih thu an sawi a. Kolasib atanga Kawnpui inkar siamthat leh tur niin, tunah hian kawngpui kam tuihawk luankawr siam hna kalpui mek a ni an ti. Black topping hna thawh tur chungchangah contractor-te'n kawngpui siamthat hna an tih hmasak phawt tur thu sawiin, Kolasib leh Bilkhawthlir inkar black topping hi November thla chawhnu lam atanga tan tum a nih thu an sawi a. Amaherawhchu, hna thawh na'na mamawh alkatra chhuan sona (hot mix plant) chu Mizoramah a lo la thlen loh thu an sawi bawk. Tunah hian kawngpui khu lutuk ti ziaawm turin tui an phuh tan a, nikhatah vawi hnih phuh tura tih ni mah se, tui harsat avangin an tihlawhtling thei rih lo tih an sawi .

He kawngpui siam hna hi Kolasib District chhungah contractor pathumin an thawk mek a. Vairengte atanga Bilkhawthlir leh Kolasib-Kawnpui inkar chu Balaji Company-in an khawih a; Bilkhawthlir-Kolasib leh Kawnpui-Khamrang inkar chu J. Infratech-in an khawih laiin, Khamrang atanga Buichali chu BR Goyal Infrastructure ten an enkawl thung a ni.

Thutkhawmah hian NHIDCL hotute leh contractor-te chuan harsatna an tawhte sawiin, Kolasib khawchhung, Rengtekawn thlengin kawngpui chin nektu an tam a, he'ng hian kawngkam luankawr a hnawh avangin kawngpuiah tuihawk a luang thin a, kawng a chhe hma niin an sawi a, hemi chungchangah hian hmalakpui turin Dy. Speaker chu an ngen a ni. Hemi bawhzui hian district bawrhsap kaihhruaiin Police, Revenue, Sub-Hqrs YMA, NHIDCL leh contractor-te telin kar lehah enfiah nise, tih a ni ati.

<><><>

SUNDAY SCHOOL

Waviin hi Khawvel Sunday School Ni a ni a, Mizoram Presbyterian Kohhran chuan he ni pual hian a bika inkhawm an buatsaih.

Puitling lamah Upa B. Lalhmunliana ziah “Fanau Enkawl” tih an zir a. Intermediate Department atanga Senior Department-in Upa Lalrammawia Ngente ziah “Tleirawl te leh Social Media”, tih an zir a, Beginner Department atanga Junior department-in Pi Lalpianthangi Hrahseel ziah “Thu Awihna”, tih an zir ani. Kumin October ni 22 thleng khan MSSU hnuaiah Sunday School 1,035, Hotu 6,031, Zirtirtu 55,480 leh Zirtu nuai 4, sing 2, sang 7 leh 261 awmin, hming zia kawng zawng hi nuai 4, sing 8, sang 8 leh 772 an awm mek a ni.

February 16, 1944-a MSSU Committee-in a rel angin Mizoramah kum 1944 atangin Khawvel Sunday School Ni hman tan a ni a. Kum 1949 atangin November thla Pathianni hmasa berah thupui nei a hmang tanin,

kum 2001 atangin puitling leh naupang lam ten zirlai hran an zir tan a. Kum 2019 atangin naupang lam chu hmun hnih - Beginner atanga Junior leh Intermediate atanga Senior-ah then a ni leh ta a ni.

Sunday School hi kum 1780-ah England ram, Gloucester khuaa Robert Raikes-a din a ni a. Hemi hma pawh hian mi thahnemngai eng emaw zatin anmahni huam chhungah mumal deuh takin an kalpui tawh a. Kalphung fel zawka a indin chhuahna leh a darh zau takna chu Robert Raikes-a hmalakna a ni.

India ramah chuan July 9, 1803 atangin missionary ropui William Carey-a leh a thiante (Serampore Trio) hma laknain Sunday School neih tan a ni a. Mizoramah pawh Zosap Rev. D.E. Jones-a (Zosaphluia) hma laknain February 20, 1898 atangin mei mit lovin kalpui zui a ni ve ta a ni.

<><><>

PTC RECRUITMENT

Akashvani (All India Radio) Aizawl Regional News Unit chuan District hrang hranga thawk tur Part Time Correspondent (PTC) a la dawn a, PTC tur hi Aizawl, Hnahthial, Vairengte, Champhai North leh Chawngte ah te a la dawn a, kum 24 atanga kum 50 inkar Graduate tan November ni 14, thleng dilna thehluh theih a ni.

PTC dilna form hi News Section, Akashvani Aizawl pisa Tuikhuahtlangah lak theih ani anga, AIR News Aizawl Facebook page ah download theihin a awm bawk ang.

Hrechiang duh tan AIR News Aizawl Social media page ah leh phone number 8131823773 ah te zawhfiah theih a ni.

<><><>

MIZO HISTORY

IAS chawl tawh Pu Rinsanga chuan tun hnai a Mizoram chhunga thil hlui laih chhuahte atang hian Mizo hnam chanchin, chawr chhuahna leh thlangtlak dan hi chhui chian leh a ngai ni a a hriat thu a sawi.

Mizo History Association (MHA)-in an kum 45 tlin puala ICAI University a 'Kan Hnam Chanchin Chhui Dan Ngaihtuah Nawnna' tih chungchang sawihona a buatsaihah he thu hi sawiin Pu Rinsanga chuan Mizo hnam chanchin chu tun lai thiamna hmang leh ngaihtuahna zau zawk hmanga chhui chiang leh zual turin he lama mithiamte a chah a. Mizo hnam chanchin chhui chin chu a hnai vai hle ni a sawiin kum 1938 a Rev. Liangkhai-a'n 'Mizo Chanchin' tih a ziah chu Mizo hnam chanchin chhuina kimchang hmasa ber a nih thu a sawi a. Chutih lai-in Archaeological Survey of India-in kum 2015 leh 2018 inkar chhunga tunhma thil an laihchhuah atanga a lan dan chuan Mizote luah ram hi an thlang tlak hun a hma lama rindan kum 1350 leh 1750 aia hma daih niin a lang a ni a ti.

<><><>